

每週經課朗誦經文(巴克禮漢羅/教羅)2014/08/03

共同經課 - 1

創世記三十二章二十二節～三十一節

22 伊暝時起來，chhoā 伊兩個 bó，兩個女婢，kap 十一個 kiáⁿ，lóng 過 Ngá-pók ê 渡頭。23 事先 hō in 過溪；凡所有 ê 亦 hō in 過。24 只有 chhun 雅各家已 tī-teh；有一人來 kap 伊相 ián，到 tī 天 phú 光。25 Hit 人看 boē 贏伊；就 siàn 雅各 ê 大腿白；相 ián ê 時，雅各 ê 大腿白 choah-tiòh。26 Hit 人講，天 beh 光 lah，tiòh 放我去。雅各講，你若無 kā 我祝福，m̄放你去。27 Hit 人講，你名做甚麼？伊講，我名做雅各。28 Hit 人講，你 ê 名無 beh koh 叫雅各，beh 叫做以色列；因為你 kap 上帝 kap 人鬥輸贏，lóng 得 tiòh khah 贏。29 雅各問伊講，請將你 ê 名 kā 我講。Hit 人應講，Mih-sái 問我 ê 名？就 tī-hia kā 伊祝福。30 雅各名 hit 所在叫 Piān-i-lī，因為講，我當頭對面見 tiòh 上帝，我 ê 性命 iáu 得 tiòh 保全。31 日 tú-á 出，雅各經過 Piān-i-lī；伊 ê 大腿已經 pái。

共同經課 - 2

詩篇十七篇一節～七節，十五節

1 大衛 ê 祈禱。1) 耶和華 ah，求你聽公義，留心聽我 ê 求叫；我 ê 祈禱 m̄是 tùi 奸詐 ê 嘴唇出；求你 àⁿ 耳孔來聽。2 願我 ê 判詞 tùi 你 ê 面前發出，願你 ê 目矚鑑察正直。3 你已經試驗我 ê 心，你 tī 暝時鑑察我；你鍛鍊我，無 chhē-tiòh 甚麼；我立志，hō 我 ê 嘴無有過失。4 論到人 ê 行做，我 thàn 你所講 ê 話，家已謹守，無行強惡人 ê 路。5 我 ê 腳定定行你 ê 路，我 ê 腳 bē-bat 踏 chhū。6 上帝 ah，論到我，我 bat 求叫你，因為你 beh 應我；求你 àⁿ 耳孔聽我 ê 話。7 求你顯明你各樣 ê 仁慈，你是用 chiaⁿ 手救 oá 靠你 ê 人，脫離 hiah-ê 起來攻擊 in-ê。15 論到我，我 beh tī 義 ê 中間看見你 ê 面；我睏醒 ê 時，看見你 ê 形容，就心滿意足。

共同經課 - 3

羅馬書九章一節～五節

1 我 tiàm-tī 基督講話真實無白賊，我 ê 良心 tī 聖神 kap 我 saⁿ-kap 做干證，2 我有大憂悶，痛心無 soah。3 因為我為 tiòh 我 ê 兄弟，我 ê 骨肉 ê 至親，就若本身受咒詛離開基督也甘願。4 in 是以色列人，有做 kiáⁿ ê 名份，有榮光，有 chiah-ê 約，有律法 ê 傳授，有服事 ê 禮儀，kap chiah-ê 應允，lóng 屬 tī in；5 列祖是 in ê 祖，照肉體來論，基督也對 in 出；伊是萬物 ê 頂面，是上帝，堪得 o-ló 到代代 ê。À-bēng。

共同經課 - 4

馬太福音十四章十三節～二十一節

13 耶穌聽見就上船，tùi hia 退去曠野，家已 toà；眾人聽見，就 tùi chiah-ê 城步行 tè 伊。14 伊出去，看見 kui 大陣 ê 人，就憐憫 in，醫好 in 中間有病 ê。15 日 mng 晡，學生就近伊講，chia 是曠野，koh 時已經過；tiòh hō 眾人四散，thang 去鄉社買食。16 耶穌 kā in 講，In m̄免去，lín hō in 食。17 In kā 伊講，阮 tī chia 只有五個餅，兩尾魚。18 伊講，Thèh 來 hō 我。19 就吩咐眾人坐 tī 草埔，就 thèh hit 五個餅，兩尾魚，ng 天來祝謝，peh 餅 hō 學生，學生 hō 眾人。20 Lóng 食到飽；拾所 chhun ê 屑 á，滿十二筐(kheng)。21 食 ê 人，婦人人 gín-ná 以外，約略五千。